

貞一齋詩文稿

貞一齋詩稿

臨川朱思本

本本初父

歸寧印 羅書

水龍吟送閔道錄醮五隆竣事歸東湖

幾年南北聲名有純孝子  
騫苗裔逃儒自愛翛閒天  
賦神仙標致歸隱東湖  
醉遊南浦滿襟清氣想當時  
宦海風波浩蕩從前錯如今是  
追念父師恩重恨  
年華暗隨流水錦帷夜醮黃壇  
春靜綠章封事香霧  
空濛步虛嘹唳孝通天地  
玉皇優詔答功勤壽甲子  
三千歲

千秋歲 壽程竹逸六十

虎溪清旭瑞氣生華屋無量壽如川福替纓門闕好  
詩禮家聲肅真樂處庭階侃侃森蘭玉 問訊溪邊  
竹色與靈椿綠多積善貞祥熟皇天私有許甲子從  
新讀千二百崆峒不待仙人祝

遊仙詩四章 為祖紫雲作

五陵有佳士乃在西山顛晝餐金光草夜讀青苔篇  
頻視世間榮於我若浮烟野鶴出雲表潛魚媚深淵  
至性不可羈誰能識其全惟應羨門子相與長周旋

西山多靈藥服食顏色好在昔有洪崖高舉云得道  
曹盧繼芳躅天地長不老後來紫雲翁辟世一何早  
連雲種復祀帶月拾瑤草貴賤俱營營終然恨枯槁  
棲遲匪迷塗被褐自懷寶去去不可留期之在蓬島  
韓康入都市賣藥不二賈女子知其名翩然事回駕  
山中富泉石至樂窮晝夜養生極元理抱道合元化  
邇來八十年閱世知代謝一朝返其真適去勿悲叱  
長休得素書字古不能識叔夜非仙才石室那可即  
夫君獨元詣幽討窮足迹蛟湖極元首元都洪崖脊

羣仙日追隨，酬唱良自適。篇章久零落，慨嘆尚誰惜。  
太元在侯芭，千古聲烜赫。撥棄勿復言，南山對松柏。

燭影搖紅 壽鄭梅菴

春到梅邊，瑞光浮動，香山裏雲端微見。老人星嘹唳，  
觀聲起，灑灑尊浮綠螳對紅粧。高歌盡醉，彩衣錯落，  
玉樹瓏璁，人生難比。谷口家聲，戶庭藹藹傳詩禮。  
天教餘慶，屬伊人爭看南山梓。那羨東風桃李向蟾  
宮早攀仙桂，賃時須記老子婆娑，一盃千歲。

戊辰年臘月大雪彌旬，古樟黃竹皆凍死百歲。

翁云有生以來所未見者追憶兒時樂事賦詩  
三十二韻寄呈仁叔兄併示雲章弟立竹姪

憶昔童幼時見雪喜無寐清晨走相喚兄弟劇嬉戲  
擊竹墜瓊玖攀簷瀉饋餽模形常透懷印跡屨亡屣  
玉虬巧追琢龜手那肯置冰盆脫明鏡密盜空美餌  
鹽櫛固已忘筆硯亦胥棄父師恒檢青掩耳寧畏避  
充然有餘樂豈惜歲月駛中年客京華飛雪大如翅  
天街跨鞍馬頃刻鬚鬢異歸來擁貂裘酒炙交餉饋  
公卿共談笑盈尺詫奇瑞雖無少年歡頗愜四方志

竭來五十六老態日夕至憑陵怯隆冬踈懶便平聲  
午睡彌旬值凍雪盡日響寒吹虛明眩窻戶凜冽逼  
衣被熾炭曾不溫醇醪漠難醉萬室被紈素千山失  
蒼翠狡兔方迷離飢鳥亦憔悴豫樟變枯槎黃竹絕  
生意適聞百歲翁咄咄書恠事荆揚古炎州殺氣何  
以致或言兆豐稔螽蟥深入地又云弭殘瘴自此蕃  
庶類胡爲鮮歡笑孤坐成嘆喟翻思同隊時此樂詎  
可覲朱顏與綠髮去去不再值深心幸聞道俯仰復  
無愧縱浪圓元化浮生眇如寄聊爲凍雪吟庶用最

賢知

道傳先生才學重當世與予遊將二十年往歲  
別於都中思慕良切比提學江西復時得聚首  
殆將滿考乃訪予玉隆宿留數日臨別賦長句  
見贈次韻奉酬聊敘今昔以寫懷耳

憶昔事北游山川飽經行揮鞭過河朔振袂趨神京  
維時柳夫子傾蓋相逢迎成均有鴻儒安能復遐征  
歲規靡晨夕孔道日以明義勝塵慮遣理融心神清  
粵從分別來耿耿馳中誠易水霜月白燕山雲樹清

竭來振鳴鐸坐使聾聵驚翼軫吳楚交秀氣鍾元精  
自古足文獻化機浩無停歐曾出奇正王晏何縱橫  
往者不可作汗漫騎長鯨予生百年後企望心靡寧  
公來實增重未俗儒化成貪汙變廉耻論諛謔還忠貞  
信知德有徵孰謂風無形聖皇急求賢為霖洗炎蒸  
召還匪朝夕羽翮橫青冥揮手提天綱舉足頓地紘  
吾聞郴郴州千古更炳靈抵掌載言笑吾孫得吾駟  
家聲亦烜赫何心尚怍怍夫子不自滿猶言有常經  
用舍非所牽澹然自和平俯仰無愧怍在已無德馨

再拜服斯訓文華願收聲當爲松柏姿勿作桃李英  
眷言從茲游蔬筍供南烹歎忘鴛鴻侶乃與鷗鷺盟  
臨期重攜手欲別終含情高歌伐木詩側耳嬰其鳴

莫春感興

推枕芸窗睡未厭春衫亭午試相縑雨淫荒蘚蝸黏  
壁風貼遊絲燕入簾靜得天機明損益閒觀物理適  
洪纖一心亨處潛真樂明鏡從教白髮添

放鯪鯉

大鈞播萬物賦形有媿妍羽毛族林藪鱗介繁江川

嗟爾穴居類蓄縮如鰻涎修鱗與利背觸地無剛堅  
整飲混泥滓蟻食多腥羶於人既無害在物苟自全  
鹿豕每犯稼虞羅所宜先蛇虺恒傷人掎擊理則然  
爾肉不登俎爾名古無傳野人亦何為畚鍤必及泉  
得之詫珍異籠檻置我前且言芼薑桂甘美逾割鮮  
性復去風濕力能已拘攣感子獻芹意肉食吾無偏  
風痺非所患平聲 恭藿良獨便南烹已云惡韓蘇著  
詩篇蜜唧常嘔吐鼃黽曾棄捐河豚美而毒智者寧  
垂涎况此更微賤忍以湯火煎逍遙古名山土壤大

且卷使爾遂生成族類當綿延長者活魚報還生切  
利天放爾匪繳福天闕誠吾憐

招賢觀

古觀少鄰家招賢名獨嘉樺松紛側塞老屋半歌斜  
野鶴驚春夢山蜂報晚衙道人華念絕行住養丹砂  
贈魏道士

爾祖伯陽翁叅同契聖功丹經明媾復火候識屯蒙  
車馬今誰到葷瓢亦屢空家聲須自振千古有宗風  
景福觀

真館留芳躅陶仙豈隱君松篁深蔽日苔蘚濕生雲  
訪古無碑誌題詩紀見聞山人有天趣清坐對爐熏

陶仙觀

安公姓陶逸其名列仙有傳垂英聲時丁典午政衰  
亂辟世甘與樵牧并新吳山水最佳處讀書種樹蠶  
且耕賢人在野時所慕正恐微辟過柴荆託言鑄劍  
感天帝赤龍擁駕來相迎翩然一去不復返世俗共  
說歸蓬瀛大唐天子好神異倅圖相地初經營槎牙  
老柏云手植樓觀倚薄何崢嶸邦家自此著祀典水

早必禱奔黎氓學徒混混拜遺像撞鐘擊鼓希長生  
神仙有道豈易得手溺烏兔餐元精但聞采藥鍊金  
石蒸砂作飯終無成安公聞此必首肯神交千載知  
吾情天風兩岫出山去杲杲紅日開清明

新吳昭德觀道士閔蟾溪以厥師張玉澗所得  
吾師月池翁書翰見示辭意篤實契意高古藏  
之四十五年矣感今懷昔為賦四韻蟾溪深得  
金丹之妙故末句及之

白頭道士說當時故老遺編手共披澗底雲深龍睡

穩池邊月冷鶴歸遲墨光珍重存金石丹訣親傳在  
次離若問箇中元妙處祇應無跡是吾師

青霞觀

故老相傳赤松子修鍊之所今專祀焉

天開圖畫越王山上樓居更好看仙子昔曾餐水  
玉道人元自鍊金丹平鋪竹樹青霞出點綴松花白  
露溥欲問羲農千古事洞簫吹徹曙光寒

真常觀文蕭吳彩鸞跨虎上征之地石壁虎迹  
猶存

越王山上力躋攀瑤草葳蕤覆石壇絕壁無梯人跨

虎層霄有路女乘鸞千年鼎竈苔花濕午夜樓臺桂  
影寒世外瑤京元不遠鳳蕭時在白雲端

仙遊觀訪羅南溪山房時南溪遠游未歸賦四  
十字以贈其徒孫金存吾

羅公深隱處帶雨得重尋老樹凌霄合空墻薜荔深  
風雲千里翮宇宙百年心更喜孫枝秀流芳見桂林  
上全陽師

好道求先覺專門見此翁中年出塵網昭代振元宗  
仙鑑多稽古丹經獨發蒙斗杓明建始卦象契叅同

玉蒂才生白金花已見

切句

紅虎龍歸土釜烏兔會

元宮偃月精華滿浮雲富貴空鍊形輕似鶴養氣浩  
如虹有志期闕尹無人問葛洪共憐身世拙誰識道  
心融鳳味簫頻弄蠅頭字更工采芝隨遠近騎鹿自  
西東藥闕班何忝瀛洲籍早通偷桃嗤曼倩賣藥鄙  
壺公委蛻全陽質流珠造化功野人希儼妙大匠憫  
倥侗信義羞明水殷勤拜下風窺牆雖累日入室尚  
深衷象罔求須得鴻濛答未窮吾師如撫項行役敢  
匆匆

送蔡體仁三首

秋高萬木落夜永候蟲鳴披衣待明發騁望空前庭  
悠然感所思乃在天北溟一別四五載關山何崢嶸  
綠酒薄清賞素琴歇芳聲忽有佳客至聊足慰吾情  
佳客江海士儒衣章甫冠文工畫更精風雨生毫端  
不作脂粉媚不為儒生酸孤鶩出雲表遠訪千年丹  
丹成井不改仙去隨飛翰握手叙契濶碧樹生初寒  
君家宜春郡春臺在其顛我屋仙巖下桂吐秋風前  
朝尋黃精苗莫飲碧澗泉相逢不忍別重是三生緣

扶桑送白日浩浩如逝川  
勗哉保明德勿作丹青傳  
丹陵道士胡天牖  
禱雨有應賦詩志喜次韻

見說蜚符起卧痾  
又聞驅雨潤嘉禾  
昔時方士聲名  
舊今日長仙  
惠澤多鐵札投龍  
通水府金鉞躍馬倒  
天河功成小住崆峒上  
一任桑田有白波

七尺時人  
呼為長仙

### 送羅道士歸九江

老桂吹香萬里秋  
折枝為別意綢繆  
廬山有鶴迎歸  
佩章水無風送客舟  
松菊故園陶令宅  
江山陳跡庾

公樓何時與子同清賞却憶西林話舊遊

宰屬顧淵白馮介軒江西提學柳道傳高灞雪  
諸名公以初夏燕集輝山熊鍊師雲徑酒酣賦  
詩為樂唱酬甚多秋中輝山緘以示予次韻

桂香涼入錦帷初誰遣詩筒一起予清節百年高士  
傳好風千里故人書斑斑文會光聯壁浩浩詞源盛  
決渠應念山中未歸客荆薪礪石計全疎

西竹引

劉俊卿淮南王幾世孫自別淮南來百年此邱園環

居種竹千萬个霜枝露葉埋雲根鳳凰飛下天風寒  
食實欲去猶翩翩西山蒼翠常在眼爽氣正挾搏桑  
瞰朝來斲取蒼玉幹持作洞簫吹不斷西山高處鳳  
和鳴雲間雜犬聲嘹亂空聞雲外有神仙不見淮王  
只見天烟霧空濛羽衣濕天低月落心茫然心茫然  
撫西竹風波浩浩隔蓬萊與爾飛龍兩相逐

題宋太祖趙普堯進石守信楚昭輔楚踰圖

五季肆淫虐極力相吞噬頤洞五十年神州開如沸  
大德方淵龍厭亂實天意數子盡王佐雲從尚嬉戲

楚踰軍中樂雍容有餘地揮手決浮雲舉足奠坤勢  
休明啓三百烈烈光漢魏誰謂其人亡千載凜英氣

寄題李氏雙桂堂

何人種德劍江陰幾世流芳見桂林冷沁瓊枝雙白  
璧光搖珠粟萬黃金才名吹起風雲闊花萼輝承雨  
露深待爾天香携滿袖華堂更擬一登臨

葛雲岫判南豐時予乘傳至郡一見半度真前  
修也別去五年重會其家葛惠詩次韻

疇昔使南州解后無心雲別來忽五載清夢時見君

今登君子堂足以慰所聞官情淡如水義利於焉分  
冰檠固清節波濤出雄文自言佐郡時有如負山蚊  
歸來撫松菊甘與鹿豕群慨嘆持斧翁寧知猶與薰  
次韻奉酬心淵師見寄

楚水吳雲道路長連環清夢耿難忘若爲化作遼東  
鶴回首琵琶是故鄉

百行人推孝行高虧成終始在秋毫應憐八十慈親  
在滯穗柔柔尚作勞

曾君靜訪予小隱園飲酒賦詩爲樂次韻

之子南豐後才名起妙年玉壺清曉出金榜赤霄縣  
滄海思鯨奮晴空佇鳳騫氣吞三峽水興逐五湖船  
耿耿葵傾日區區石補天推賢惟爾最序齒愧吾先  
莫作龜逃楚終朝駿在燕幾年文會隔今日酒盃傳  
脫粟諧真率誅茅得靜便林塘堪小駐共釣錦鱗鮮  
雲章弟次韻見教既工且敏再用韻以美之

令弟良師範詞華見盛年包蒙鳴鐸舉待問應鍾縣  
風采真殊絕家聲定不褻腹饒邊氏筭目短米生船  
道學還希聖行藏祇任天應門今有託入室更誰先

義重嗤秦越才高慕許燕文章千古在經術幾人傳  
老大子將嬾精靈爾尚便青雲如得路為政慎烹鮮  
諸昆弟友朋屬和者疊出追憶舊遊依韻再賦

憶昔游京國驅馳屬壯年致君心炯炯戀闕思縣縣  
桂館恩重被楓宸禮未騫屢騎沙苑馬幾泛御河船  
鰲極三千界龍光尺五天奉祠曾詔許歸隱孰吾先  
倦翮南依越深衷北慕燕親朋良有助風雅不虛傳  
世味今逾淡山棲老漸便詩筒來往罷清賞對蕃鮮

發山中

穀旦發名山駕言趨上京車馬如雲集把酒送我行  
須臾陟東嶺回盼仙人城晚圃秋正濃露華綴金英  
胡爲舍此去乃與塵俗縈人生有行役豈必皆蠅營  
威鳳高其翔千載相和鳴勿作兒女別慨慷舒長纓

薊溪卧病

辭家至薊溪信宿不能去六氣馮吾軀右足重如注  
醫師試鍼砭轉覺氣血聚呻吟數更漏永夜杳難曙  
令佐賢主人情親靡新故盤餐交饋餉藥石云致助  
懷土非吾心豈爲桑下顧安得乘飛車一去千里路

自弋縣過了頭巖夜行至信州

葛溪道士嘗新酒明月巖前憶舊遊  
驛舍荒涼秋欲老筍輿登頓莫生愁  
長風列炬棲鴉散淡月流鈴吠  
犬稠假寐醒來過夜半城頭擊柝是吾州

玉山縣

肩輿出城闔初日半天赤莫宿玉山縣  
風雨秋寂歷連峯結長陰一水界空碧  
翻思壯游地白髮非宿昔去去欲何爲  
感歎不能息何當營丹砂吾師契金石

常山登舟

東浙三年別重來異故吾負病便坐卧投老倦馳驅  
藥裹憑誰檢詩囊祇自娛江山如有意雨後獻新圖

浙江

吳越山連海岸頭兩山迎送意綢繆秋深水落人家  
出日暮潮生釣艇收滿眼流亡何日復傷心凋瘵幾  
時瘳東南自古繁華地底事于今異昔游

廟山九日

疇昔使錢塘夜宿廟山驛維時九日至豐年盡歡懌  
亭長醉如泥推情靡呵責邇來二十年駐此感今昔

黃花復重九采采耀顏色良由沒巨浸魚鱉為鮮食  
壯健多流亡老羸轉溝洫厨傳恒蕭然酒炙那復得  
清晨驅車去城闔更寥間當道多相知欲語淚沾臆  
東南十萬斛歲漕輸上國今茲民力竭何以繼供億  
聖明仁如天聞此應愴惻誰當繪為圖獻納通宸極

寒疾

足疾良未愈又與寒疾嬰黃昏抱冰雪二氣疑交兵  
齒牙自相擊顫掉兒童驚須臾內熱攻衽席風火生  
汗流甚出浴渴飲如長鯨嘔泄加痛楚永夜聽嚴更

投老復行役何以舒吾情寄語故山友慎勿辭力耕

東吳行

君不見浙右良田千萬頃陳陳積粟深於井又不見  
東南漕運輸上京舳艫千里浮滄溟去歲江淮丁旱  
曠黎民餓死殆將半米舟來者皆東吳處處延頸爭  
歡呼今歲東吳遭海溢太湖湧波高百尺夏秋之間  
陰氣凝十旬風雨鞫陽精吳江浙水不復辨鬣鬣蓬  
萊眼中見稽天巨浸十六州良田潏潏蟠蛟蚪豪家  
發粟賑貧乏室如垂罄無餘留飢民即死不能舍聚

爲盜賊橫戈矛此邦租賦半天下安得不貽黃屋憂  
明年海運何自出必藉隣境交相求江閩湖廣迭兵  
旱比歲瘡痍殊未瘳救荒有術在青史河東河內非  
良謀太平天子至神聖億萬蒼生仰司命一念通天  
天必從普天願見年年豐

金山歌

金山上江流觸石掀白浪金山下江水朝宗疾如馬  
長風萬里爭喧逐晦明兩岸聽奔雷樓船一日知幾  
度北去南來風火催金山解語應喚客前時綠鬢今

華髮去來袞袞為誰忙坐見蟾烏逝明滅周公大聖  
去不回盜跖凶頑安在哉銅山餓死等陳迹珊瑚金  
谷俱寒反賢愚貴賤盡如此自古年華逐水流高奔  
日月駐朱顏惟有松喬羨門子祈孔賓心已詣金山  
歌歸去來

廣陵行

廣陵城外秋草肥廣陵城中車馬稀鬪雞蹴踘不復  
見朱箔青樓塵掩扉聖世承平六十載何事繁華一  
朝改長老未說淚先垂聽我長歌爾應該去年春旱

天無雷種不入土心已摧夏秋日色烈如火萬里良  
田俱草萊三冬殺氣更嚴酷運河凍合光如玉十室  
八九無炊烟父兄愁嘆妻孥哭今春雨滑動犁鋤忍  
饑力作交相呼奈何螟蠶蔽天起所至草木無遺餘  
捕蝗作食已云惡疫癘無端扇餘虐死亡枕籍無人  
收賴有王官爲掩骼廣陵城中十二門抱關老卒記  
甚勤與尸一門日百數兩月漸見無行人廟堂賑濟  
頒良策宣聞愛民心甚力縣胥里正肆姦欺遠者那  
能沾帝澤十人今有幾人留况值秋田又半收只今

痛定更思痛轉覺涕泗縱橫流人生有情須愴惻惆  
悵蘘黃難再得大書傳作廣陵行持斧何人應動色  
高郵驛阻風

鞍馬驅馳未得閒不緣衰疾敢求安長湖三日波濤  
惡孤館五更風雨寒青纒束薪無煖席紅炊脫粟愧  
加餐驛程牢落今如此信有人生行路難

題柴南山雲島隱居圖

北山藹晴雲南山挹清潁中有仙人廬荆扉迹如掃  
尋源種桃花帶月拾瑤草風帆自去來咫尺迷烟島

淮河曲

淮水清河水濁二水交流風更惡誰云鞭石役神人  
不信填河有烏鵲我欲馮河黿鼉縱橫曷梁不爲我  
作但願皇帝陛下萬萬歲常居紫宮臣無營住崆峒  
年年獻壽騎飛龍黃河水流與天通臣心如水將焉  
窮

盜發亞父塚

戲馬臺前范增塚英風千載行人竦塚中寶氣騰光  
芒識寶賈胡心爲動築室潛謀二十年一朝鑿井穿

其壘畚鍤繞深四丈餘乃有石磐青巖崐四旁狀杙  
大十圍各施九木森環拱石穿棺翼更分明漆光可  
鑑剛而鞏斲之不用揮金椎白骨儼然全頂踵寶劍  
未化橫蒼蚪金玉輝煌氣交擁賈胡致富須臾間棄  
骨溝中寧愧恐平原無色鼓角悲山鬼夜號川澤涌  
太守陳公英俊才慨嘆姦偷吾所統亟呼五伯取群  
盜械置狴犴見仁勇傷哉亞父天下奇鴻門高會真  
危機火龍飛起實天意拔劍起舞空爾爲風雲變化  
夫隆準玉斗一碎山河非如公明義古亦少發憤乃

作彭城歸六合茫茫漢疆土厚葬何人誠可嗤君不  
見驪山牧豎遺燼酷不如王孫裸葬良亦足

觀獵

青徐十月天色黃欲雪未雪雲茫茫將軍馬肥鷹隼  
疾草枯狐兔那能藏良家子弟盡驕悍彎弓大叫隨  
跳梁停鞭借問誰氏子虎符世世綰銀章或在鷹房  
久通籍或屬愛馬從藩王生來一字都不識割鮮豪  
飲鬚者張夜歸酣笑詫妻妾鞍馬累垂縣兩狼古今  
治亂殊未省豈有謀策輸忠良一朝親故相薦拔起

家執戟齊駕行剖符作郡擁旄節炙手可熱勢莫當  
儒生心事良獨苦皓首窮經何所補胸中經國皆遠  
謀獻納何由達明主獵徒一出專城居慎勿平原輕  
獵徒

次韻酬盧道士

玉川有能孫濯濯者字秀義方飽嚴訓豈獨燕山竇  
經史俱涉獵百氏頗搜究束髮入龍虎辭豕別清溫  
壯游閱山川浩氣彌宇宙颺車予北上短轅爾東走  
相逢豐沛間振袂拂長袖任城枉新詩字字相勉懋

聯翩風雨快磊落金石奏精靈信方剛稱賞寧敢繆  
吾聞青牛車疇昔出關右著書傳尹氏良遇非邂逅  
憐君好道篤有志功竟就當爲君子儒必變九夷陋  
吾言倘未孚行哉豈求售

藝文監丞高堯臣夢元冥子偕游瑤圃賦游仙  
詩一首次韻

至人合元化燕處形神清天風西北來羽駕秋雲輕  
自道元冥子意適東南行東南絕遼海玉樹多奇英  
崑崙隔其西况與弱水并宮闕皆黃金五洲峙元瀛

誰能造其間擾擾徒心兵幻化了不悟終始尋虧盈  
狂馳百年內豈識仙人城於焉有真樂求我非色聲  
夜月輝碧草晨霞散朱櫻太賓鼓瑤琴子晉吹鸞笙  
上有飛龍吟下有白鶴鳴以爾絕華念領首相逢迎  
但見虎豹關神官結長纓鈞天逸餘響曲終復誰賡  
頻視大瀛海萬里搖空明元冥載言笑此路當重經  
假爾赤鯉歸遠逐琴高生夢回北窗下慨嘆薄世榮  
披衣望霄漢耿耿空含情

玉堂諸老賞梅花於唯貫精舍伯生先生即席

賦詩和者成軸明日僕始知之次韻聊發唯貫  
主人一笑

江南臘盡梅殘後冀北春深花正開窈窕綠花天上  
見聯翩青鳥海邊來西湖夢斷迷烟雨東閣詩成費  
酒醅文會我遺應自笑好耕耘處久汙萊

夜坐次韻于仲元

踵息方鴻濛深心了無着天街鬧燈火車馬紛倚薄  
喧靜理固殊趨舍由所學置此兩忘言風簷自鳴鐸

代嗣天師題所翁九龍圖

元雲潑墨號天風雲頭擲火驅雷公元氣淋漓雨師  
急天地變化誰為雄兩龍奮迅見光恠天橋西行出  
天外一龍起處山石摧摩蕩餘聲隱磅礚一龍不競  
群龍趨搏取明月看隨珠老龍居中最蒼古盤旋引  
子方自娛一龍出水露頭角白浪如山映空作一龍  
飛上蒼茫間傾倒天瓢振枯涸最後一龍心獨閒回  
頭似欲歸潛淵騰躩宛轉各異態匪能安得知其全  
洞微物化僧繇去千載神交所翁繼觀龍不在鱗鬣  
精妙用應須論神氣九陽數極變必通此物豈因絨

滕中但愁辟歷隨昏濛一旦飛去蒼旻空

次韻題墨竹

黃景高所蓄墨竹凡四軸其一子昂趙公所  
作伯生虞公題之其一息齋李公所作復初  
元公題之其一員嶠李公所作本心周公題  
之其一嗣天師太元所作思本題之俱用伯

生韻

我屋琵琶東清溪轉山曲天風度林梢泠泠韻蒼玉  
金鋪颺庭戶絕勝簞簞谷失脚京華塵慰眼見疎竹

天人有天趣寫作洪園綠誰夸千畝多意足寧半幅  
故山春雨深濕翠峯六六對此意茫然南飛愧黃鶻  
寄玉隆宮道士秦古閒喻山雨

南州高士在西林萬里相思去夢尋生米渡頭春浪  
闊采鸞岡上莫雲深丹藏石鼎溫溫透酒熟山瓢欸  
欸斟應笑天邊未歸客蕭疎華髮不勝簪

春日書懷呈主教大元閒閒二真人

雲邊候鴈感征夫老去悲歡覺倍殊春入故園催筍  
蕨雨荒南土張蘂蕪無心戀闕緣多病有夢還家喜

載驅早晚皇恩下元省歸舟隨處是蓬壺

寄猶子世權

倦遊何處不思家問信空傳海上查遲莫不妨梅有  
實平安尤喜竹無花高車駟馬非吾事剝水殘山玩  
歲華卜築可能勝舊業詩書勤苦是生涯

訪李漑之學士不遇

山人帶雨來相訪學士朝天去未歸乾鵲遠簷通喜  
氣遊絲入戶靄春暉光聯柳月磨黃道瑞應文星在  
紫微聖德惟新無闕事知君補袞用工希

記夢

憶昔慈親屬莫年，明璫翠柏插華顛。  
燕山夢裏從容見，忍向東風聽杜鵑。

代嗣天師送陳華隱歸閩中歌

有叙

陳華隱志于道者也。自閩中來京師，凡二十餘年。公卿大夫與之游，靡不加敬。而卒莫有能羈之以名汗之以利者。非有得夫道而能至焉者否也。一日告別，謂將歸其鄉而終老焉。予嘉其為人，乃為之歌以贈之。其詞曰：

伊閩山之大小既峻深而益奇閩之水兮清且連漪  
隱居而得其趣兮何羨乎太華之巍巍彼希夷之高  
卧而有待兮要終歸于道而無爲爾泛覽而遐觀于  
兩都兮當聖明之盛時羌被褐而懷寶兮望閩山而  
言歸薄流俗之詭激而競進兮獨撰轡而南馳食其  
土而韜其光兮與松喬偃佺而相追道吾道而問訊  
兮質吾言之希微觴流霞而擘麟脯兮指五洲以爲  
期昔宣尼之浮海而求從兮登仲由而進之爲吾徒  
而得吾志兮舍斯人其焉推

寄贈藏六處士林恬齋

見說閩山八十翁蕭蕭綠髮更方瞳一從起處先天  
見六到藏時妙理窮胎化鶴飛空掩冉踵深龜息正  
鴻濛知君不羨莊椿壽道在崆峒石室中

先天乾居正南其數為一天地定位也後天乾  
居西北其數為六父母退藏也

題雪洲

空明萬頃絕纖埃惟見飛鴻去復回沙上黃蘆欹玉  
樹磯頭蒼石見瑤臺銖衣縹緲江妃下寶藏輪囷海

若來此地竟無車馬到人間誰信有蓬萊

代嗣天師題雪舟

海上仙家有鳳麟琪花瑤草四時春尚嫌碧色浮黎  
土故把天瓢瀉玉塵

清明日感興呈元德真人

天邊為客遇清明慙愧壺觴不用傾午夜松楸頻入  
夢舊時桑梓更關情青春慰眼駸駸過白髮欺人故  
故生何日歸來重侍席看雲亭上話京城

元德真人連枉二詩下教且分上尊見餉其二

章有山閣看雲之約再用韻以謝

蕩漾春光照眼明感時懷抱向誰傾黃封遠餉憐羈  
思青眼相看薄世情曾事金丹聞至道更求鴻寶學  
長生懸知山閣看雲處不羨樓居在五城

元德真人三和清明詩韻歸興浩然復用元韻  
賦兩章以勗挂冠之志

軟紅塵土暗春明遊子紛紛意氣傾塚上麒麟勞遠  
夢山中猿鶴愧深情著書長羨東臯子携手寧忘北  
郭生雅量定應同此樂歸心日夜遶江城

皇都霽色映空明却憶江南積雨傾  
羈旅了無行樂興家人應恁未歸情  
天邊雨露兼榮辱海上風濤寄  
死生杜宇不啼須有待佇聽環珮出灤城

紫清真人薄暮見過凡再跋燭語未休  
深請予苦吟五用韻解嘲

篝燈相對夜深明話到參橫斗半傾  
鉛汞工夫端有術詩書事業未忘情  
鑑湖已作真狂客飯顆還譏太  
瘦生若向豐年求至道夫容何處有仙城

伯生學士見和僕與李學士詩紙尾批云已與

漑之約紅梨花開當往訪也卧病不知春事淺  
深清明後四日聞紅梨花盛開復用清明詩韻  
呈元德真人伯生漑之二學士

紅入梨花媚更明黃鶯飛下眼頻傾玉容帶酒含春  
色絳袂迎風感物情幻化可能窮妙理追歡聊復得  
浮生開尊爲報虞夫子莫待繽紛雪滿城

送真主簿歸閩中十韻

西山叅政之五世孫

四海真夫子能孫見老成席珍曾待聘經術早知名  
意氣追前哲辭華啓後生一朝新渥重萬里故鄉榮

芳草勤鞍馬光風卷旆旌卑棲無俗態凌厲有家聲  
報國心須切居官志在行豈能淹驥足必竟展鵬程  
健翩翩起倚蘭葉葉明求賢當此日早晚看登瀛

次韻答趙同知魯詹二首

相逢玉樹照人明幾見金盆落月傾冀北春天長作  
客湘西夜雨若爲情風雲變化真餘事湖海棲遲寄  
此生詩酒可能道遣得又隨車馬出都城

萬里思家共月明知君心逐水東傾雲邊候鴈驚春  
事馬上朝鷄感宦情莫作脂韋終玩世寧從麴蘖自

全生何時擺落功名念歸釣湘江綠遶城

清明後四日紅梨花開用明字韻賦詩一章奉  
邀虞李二學士以踐看花之約元德真人且屬  
和矣學士竟不至又六日風雨大作花已委地  
依韻再賦一章呈元德真人并簡二學士

霞卷雲舒映樹明花如嫵媚向人傾仙翁染翰饒詩  
興學士停驂傲物情有限光陰春事老無端風雨莫  
愁生明朝掃地紅英遍却待尋芳出鳳城

都中春莫次韻酬丁元善

燕山穀雨全無雨遊子紛紛載酒過輦路塵飛芳潤  
少官河水滿綠陰多墻頭厭見千秋影馬上時聞敕  
勒歌歸興已隨春事去嬾吟猶自和羊何

秦翁壽詩

監察御史元卿之父

太行之東有洺水恒潭閒氣鍾清美系傳秦仲著名  
門積善固應生令子乃翁八十更康強炯如巖電雙  
瞳方三壽作朋稱古昔龐眉昆弟羅中堂兒歸上國  
拜家慶斑衣畫繡交相映滿床簪笏耀鄉閭俯僂踰  
垣畏明命如翁盛德那可知天開壽域增期願兒當

勲業滿天下榮封大國長熙熙

權歌

友人于仲元詩仙也居崇文宮擅雲錦溪之  
勝命工繪爲圖携至京師翰苑諸公皆爲擢  
歌以美之仲元徵予同賦爲作十首

雲錦溪頭春水渾桃花泛泛出前村  
維舟便欲尋源去怕有秦人百世孫

雲錦溪頭烟樹多隔溪時聽采蓮歌  
調冰雪藕正行樂急雨翻蓬奈若何

雲錦溪頭秋月明芙蓉兩岸擁霓旌一聲白鶴來何處縹緲群仙下玉京

雲錦溪頭釣艇收雪花搖蕩玉光浮來來去去亦何事莫是山陰訪戴舟

雲錦溪頭遊冶郎雙雙馬上折垂楊鳴鞭忽去不可執酒旗高處吹笙簧

雲錦溪頭翠靄空垂綸嫋嫋弄秋風水光山色日夜好髣髴吳歌在剡中

雲錦溪頭山色佳東南遙指是琵琶灘高水急不易

到上有仙子餐晨霞

雲錦溪頭水拍津  
釣竿隨意掣金鱗  
吳江不羨尊鱸  
美得似吾儂有幾人

雲錦溪頭宮殿開  
五雲深處是蓬萊  
群仙不限風濤  
險一日應來一百回

雲錦溪頭風露清  
看雲亭上月三更  
仙翁却在天高  
處萬里相思共月明

發都中

疇昔居上京  
結交翰墨場  
壯志日以舒  
歸心已遺忘

重來感斑鬢故舊半存亡但見浮雲馳終風自飄揚  
登高縱遐觀到景垂精光神州擁元氣瀛海翻微芒  
浩然發幽興駕言還舊鄉回首金臺巔耿耿遙相望

通州

王畿昔全燕東郊控遼海巖巖左馮翊井邑故莫改  
白河繞城東榆關阨其背舟車沸崩騰倉庾高嵒嵬  
朝聘通九夷制度垂萬代沈思明良會神功耿猶在  
伐石著銘辭清時尚誰待停舟獨悵望過雨聊一快

直沽口

直沽海水白黃流汨其涯斥鹵滋蔓草腥氣襲流聚  
蚊蠅感陰氣育此固所宜喧囂集群醜落日常蔽虧  
利背甚蜂蠆馬牛苦瘡庾居人不安寢耿耿思晨曦  
叩頭問天公善惡豈不知善類世恒少惡物繁更滋  
天公竟無言去去良獨悲

觀海船

大舶乘天風蓬蓬轉溟渤歲遭千萬斛彌旬徑燕越  
歸虛浩無底九首爭閃舌操舟失常度千夫共淪沒  
盧溝導金水翁云帶金闕直沽環海遠地利殊未發

屯田信良謀經國在明詔王畿苟殷富飛輓誠可輟  
聖明仁如天忍使民力竭鄭白亦何人誰當繼遺烈  
長蘆鎮

長蘆際東海海水日夜盈斥鹵白皓皓窮年事煎烹  
舟車徧燕趙射利俱營營官鹽苦高價私粥禍所嬰  
里胥肆姦販均輸及編氓食貨實邦本損益偕時行  
竭澤匪中道無乃傷其生丙魏垂休光宏羊竟何成  
至順二年夏五月二十八日自通州登舟南歸  
連日陰晦涼如深秋六月八日過陵州風雨寒

甚清晨可以挾纊

陰陽失調燮寒暑不復常時當三伏中詰旦如秋霜  
浮雲蔽白日錯莫無精光鶉火慘不舒祝融竄遐方  
颯颯風雨至海氣侵肌涼蒿師向我言怯此單衣裳  
盛夏資長養反常即為殃平心憂國心願覩斯民康  
天公果無私曷以贊我皇安得生羽翮上訴摩穹蒼

御河

御河注東北汨汨如濁涇流屍日夜下水氣為之腥  
飲食常嘔吐欲住不可停舟子向我言此輩皆天刑

東吳沒巨浸食及蒿與萍死者十七八存者多飄零  
為奴逐商賈疫癘剝其齡脂膏飼魚鼈魂魄遊滄溟  
守令肆豺虎里胥劇蝗螟廟堂列臯夔直以遠莫聆  
繡衣自天來號令驅雷霆遺民願綏輯庶用荅皇靈

舟中讀書懷趙全陽

舟中了無事時讀古人書眼暗苦字細置之復躊躇  
憶昔自北歸目力尚有餘望雲數飛鳥臨水閱遊魚  
俯仰七八年氣血日不如羲和鞭六龍歲月猶驅車  
學道事已晚胡為昧其初懷哉全陽翁所寶真璠璣

臨清會通鎮

世皇一文軌強幹隆中都鑿渠枝汶河畚鍤勞萬夫  
北流過大野鄆博咸歸輸浩浩六百里遠近牽軸轆  
南金出楚越玉帛來東吳梯航畢山海異狀爭睚眦  
天府日以盈九州靜無虞神功絕今古聖德不可模  
此地實衝要晝夜聞歌呼會通錫鴻名萬代稽典謨  
穹碑照闕闕列肆吹笙竽過客立亭下行行復踟蹰

白鳥

臨清水滿草萋萋  
龜鼃紛紜白鳥飛  
七澤魚肥鷹隼

少多應相逐向南飛

黃鶯

楊柳陰陰兩岸齊  
斜牽百丈過沙堤  
方舟野渡喧爭處  
午夢醒來鶯正啼

驟雨

疾雷驅雨過東昌  
柳下維舟喜暫涼  
市散人稀風寂歷  
獨餘雌霓伴斜陽

聞蟬

綠槐高柳護溪陰  
盡日新蟬嘒嘒吟  
却憶靖通深竹

裏薰風時復聽瑤琴

梁山泊

大野傳禹功厥浸連魯衛蘄蒼溷虛休蒼茫眩溶漚  
濟陰極東原連雲浩無際昔爲大盜區過者常裂眦  
今爲堯舜民共樂太平世運河經其中盡日聞榜柁  
憶昔淮遊遊潏潏環水蒞園田千萬頃蓄泄時啓閉  
比屋皆陶朱紅陳溢租稅於焉有明鑑不必勞智慧  
苟能用斯術富庶良可繼吾言匪迂疎安得躬獻替

木筏



客行秦郵道觸目增慘悽死人亂如麻肝腦傾塗泥  
草屋半頽壓牢落如雞棲一室四五人骨肉同顛擗  
狗彘既厭餒烏鳶亦悲啼腥風徹雲漢冷氣干虹霓  
問之何爲爾苦饑食蒿藜春夏生疾疫累累委溝谿  
親戚俱已沒他人各東西過者皆擁鼻我何獨酸嘶  
掩骼著經訓仁人詎終迷安得元結輩惠化周群黎

孤兒篇

孤兒可六歲赤立古道邊逢人即下拜哽哽聲淚連  
父母俱疫死閭里相棄捐兒生不自保旦夕歸黃泉

爺孃救兒命感戴期終天下馬一撫之中腸爲憂煎  
裹飯旣莫及揮金諒無全我欲以爾歸翻恐成禍愆  
疫癘有薰染世俗交相傳去去復回顧涕泗俱潺湲  
夜宿邵伯驛展轉不得眠中宵急雨至殺氣風雷先  
念彼曠野中孤兒死誰憐守令美與服日事扑與鞭  
妻孥自殉媮撫字心茫然采詩侯王命聊著孤兒篇

棄親行

金陵城東八十里龍潭江上南山趾積樞從衡滿道  
旁不封不樹惟荆杞朽者暴骨沾泥沙近者尸蟲出

棺底天陰雨濕狐狸嗥炎赫煇蒸蠅蚋起問之耆老  
此何為具道東南風俗鄙貧家死喪無餘地火葬不  
如風葬美置之原野任飄揚子子孫孫那復視月深  
歲久為黃土安在烏鳶與螻蟻北盡淮南南及越習  
尚猶來斯久矣官今乍見為驚嗟終返空無非恠傀  
聞之心動毛髮寒異俗居然無類泚此地昔為吳越  
區系傳古聖宗姬似五馬渡江文物盛中華士族多  
南徒養生送死禮猶存作俑何人胡乃爾昔聞海上  
有茶哇歌舞送尸云祭鬼鬼享即為禽獸食親與鬼

諧心則喜尸完不食翻悲泣王化不漸何足齒吳兒  
甘分習茶哇仁者因應知愧恥長民自古需賢才易  
俗移風著青史誰當傳此棄親詩願與斯民振頽靡  
季冬雷雨彌月暖如春中

至順二年冬陰陽益驕蹇時當復為臨已覺寒氣淺  
感發無希聲泉源有餘泣崇朝急雨至永夜奔雷轉  
翳翳逾兩旬濛濛失蒼嶽溪流與平陸咫尺不復辨  
田家最愁思歲莫饑凍剝頻年苦饑旱租稅詎能免  
方春待于耜所望心力展胡為甘澤早常恐朱夏鮮

舉頭見浮雲浩浩那可寡貴賤永相望華筵正沈湎  
至大四年辛亥子年卅九承應中朝奉詔代祀  
海嶽冬十二月還京師與歐陽翰林同舍守歲  
賦詩和東坡龍鍾卅九勞生已強半韻至治元  
年辛酉又與歐陽偕留京師除夕用韻述懷通  
來十年春秋五十有九矣感今懷昔追和前韻  
呈秦古閒喻山雨諸友

人生百年中哀樂每相半誰云學道者亦作逝川歎  
翻思昔所經顛倒供戲玩過眼如春華旋空逐雲散

浩然賦歸來甘與麋鹿伴情親獲益友啓沃資月旦  
通來十餘年篇章已堆案去歲復北轅心緒苦紛亂  
今茲遂初志如熟得清盥白駒駛流光羲和敢稽緩  
明朝盈六十甲子若魚貫怯夫不知奮勇士寧肯懦  
一氣存吾中丹爐擁紅炭諸君文字飲亦足張真館  
從渠北風勁共愛南枝暖添年有青精保此三英粲

辛亥歲所作

七十古所稀四十過太半蘇公已聞道尚作龍鍾歎  
吾生亦有涯胡乃爲物玩京國何淹留萍蓬悲聚散

海嶽崇明祀久失樵牧伴驂騑駛康莊不寐幾昏旦  
歸來見天子紅雲擁香案觀風使臣職詎敢陳理亂  
栖栖分幽屏耿耿忘梳盥歲事忽崢嶸坐使衣帶緩  
起予得良朋剖析精唯貫長才發英華高節振孱懦  
更闌語未休豈復計薪炭守歲亦云樂椒觴闌孤館  
頓消殘臘凍行迓春陽暖霜鍾萬戶動一笑三星聚  
辛酉歲所作

買臣負薪時百歲殆將半富貴需何時行歌匪長歎  
太白真仙才風月飽清玩行年四十九往事逐烟散

知非不可復乃結雲水伴念念營丹砂吸景在清旦  
二賢餘事業史傳列公案修名蓋今古景行照衰亂  
吾言適爾同上國屢觀盪舉首遙相望鞭策寧敢緩  
丹心日星麗精義金石貫斯人亦何人自奮豈頑懦  
况逢聖明時清夷異塗炭致君非吾事探賸志元館  
共茲松柏寒勿羨桑榆暖斐然賦新詩發子一笑粲  
賦詩之餘見者咸謂僕殊無白鬚不類六十歲  
人明日元旦遲明山雨和韻已至清麗可愛用  
韻再賦一章呈諸友

常時六十翁鬚髮白居半攬鏡尚黑髯堪憐復堪嘆  
平生四方志豈爲兒女玩龍門見河清衡嶽企雲散  
邇來三十年多病惟老伴曙鼓啓重門陽和又元旦  
火城列銀花投刺紛几案遙知闥闈中雜踏車馬亂  
吾儕分幽棲何事躬薦盥雲霞映鳴珂頗勝佩韋緩  
竹宮叅祠官矜蠻義同貫却憶少年時剛腸嫉柔懦  
於今定何似落落灰中炭可人數君子講肆同茲館  
吾衰任自然豈復計黔暖起予得清詩玉齒爲君粲

次韻答程竹逸

勞生閱百州轍迹天下半過眼秋空雲徂年復何歎  
結交空四海敢以人物玩相知恨遲莫每聚隨復散  
豈忘鷗鷺盟寧逐鷓鴣伴夫君河南裔信哲明旦旦  
諸郎盡瑰偉瑚連紛在案邱園有遺逸砥柱俯零亂  
義勝忘邊幅神清聳巾盥扣門蹴春雪頗恠馬蹄緩  
論文見雄深於道實同貫大音振希聲感發存勇懦  
灑灑聆霏屑温温擁爐炭明朝寄新詩翠墨照瓊館  
落月屋梁間光風散餘煖欲和不成吟寒燈翳復繁

次韻答程從禮

竹逸令子

汗牛五車書讀者誰能半才難古云然於今復何歎  
晚歲得程生桓圭屏珍玩既見心則降忡忡百憂散  
歲寒松柏稠投老資爾伴別來心炯炯命駕常待旦  
遺我英瓊瑤報之青玉案高堂聳靈椿風葉森不亂  
連篇枉佳句每讀必先盥君今醫國手千古躡和緩  
雄文大江流浩氣長虹貫友道知損益儒風振庸懦  
戰藝期高秋鋒鏑出爐炭從來廊廟器亦自諸生館  
行看步青雲德布陽春煖故交諒無忌方外師可聚  
從禮一和三章字字精辟鈍根纔答三章復至

愈出愈奇其一論文敢不退避三舍其一論道  
因據所得答之其一詫僕遠遊輒序出處迷懷  
共成三章奉謝

聖人自主知尚著數學半况我昏愚人臨文漫嗟嘆  
來詩語絕妙字字足奇玩雲霞乍舒卷風雨歛飄散  
鮑謝難爲工陰何敢求伴藻麗彌春空清明旭秋旦  
鈍根尚遲回敏手分滿案所愧非錦心搜枯轉煩亂  
譬如汲甕井汙濁那可盥應鱗巨源踈勿恠安石緩  
文章雖小伎於道同一賞羨君正而葩發我庸且懦

孤坐挑寒燈長吟續銖炭老柏隣虎溪元關隔儒館  
東風忽回春一夜衾裯暖相思如見君梅花耿孤粲  
憶昔年少時醉遊日叅半忽忽思娛嬉何曾識悲歎  
行行遠求友河山飽經玩鵬南風翮舉馬北霜蹄散  
五十纔知非羈孤復誰伴畏塗久冥行旭日喜方旦  
精微得心傳糟粕笑書案已知沉絮定肯逐風花亂  
無營復何思不垢焉用盥憐君多道氣此志那可緩  
孔李普通家宗乘本相貫來詩見深情砥礪匪頑懦  
在宥觀其生陰陽日爲炭翻然真我從崆峒有珍館

蕩蕩天風寒温温日華暖吾師豈吾欺丹光已於粲  
中年客京華讀書至夜半每觀聖人心掩卷自三歎  
予時正求友珍寶非所玩翰苑多名公車馬紛聚散  
暫違巢許鄰頗愜變龍伴匪伊聲利求造請尚昏旦  
有時直承明咫尺御爐案年華迫衰鬢坐見秋蓬亂  
乞歸忝祠官征塵喜新盪傾蓋欣相知掃門敢迂緩  
聖學尊程朱萬殊理融貫吾衰尚能勇爾壯夫豈懦  
出處雖不同論心豈冰炭賓王昔天衢樂道今元館  
九霄風露寒斗室烟霞暖得失勿復言簷花一燈粲

早春水漲寒甚

三年建寅月沴氣常鬱蒸十日九雷雨泉源盡奔騰  
夜月纒舒光朝簷復如繩朋儔絕來往車馬憂凌兢  
滔滔覆江海浩浩迷邱陵未聞驚蟄先有此巨浸乘  
北風間號寒泥濘兼輕冰疫癘逾二載凶荒苦相仍  
冬春反常令經訓良可徵坐令憂國心耿耿忘寢興  
燮理在元宰臯夔已同升凝情望天北回斡期三登

崇仙觀

神仙出東晉靈迹遍荆揚太史開錦帷老柏何蒼蒼

弟子餘十人英聲各輝煌烈烈神惠君炳靈見真陽  
松篁擁樓觀烟霧披巖廊丹成井竈在零落栖餘香  
千載如一朝福被斯民康所以恢學徒精修道彌光  
今辰拜遺像感此日月忙刀圭儻可求稅駕終徜徉

崇仙觀次韻壁間留題

真人化去幾時歸吊古休彈獨掩微任法至今悲衛  
鞅說難終古薄韓非應知筮仕多零落爭似求仙自  
奮飛千載神交惟此道從教世上有危機

遊真陽山得聶鍊得一二生妙齡知學以詩來

見辭意勤至非欲速成者賦十一韻以答之

昔有皇初平學道弟兄偕道成摠仙去金華藹崔嵬  
真陽名古山人物多瓊瑰二聶方秀發烟霞滿襟懷  
新詩力追古字字勤敲推嗟予忝先覺稟性寡所諧  
以爾道心固嘉言勿嫌猜精心去姦賊勵志除蒿萊  
嘉穀日以滋天光豁然開換骨知尚時仙凡信遼哉  
雲端謝平起今古皆奇才

寶豐山

道書華蓋三仙君所治

走謁華蓋君迢迢萬松嶺雲霞散朝輝霧雨翳陽景

猿啼山更幽鳥哢日初永躋攀足彌倦接違心已領  
樓觀空崢嶸嵐光襲衣冷入門何所見綠草聚毒龜  
藩籬藉荆榛夜宿抱虛警晨炊拾墮樵清絕異塵境  
紫筍供長剝甘泉出修鯁野人尚營營我意獨便靜  
黃房息深深虛室光耿耿亦欲從茲遊悠然視其頽  
贈始豐山道士陳此元道書始豐山第三十七  
福地文始真人尹喜所治唐神仙文蕭吳采鸞  
於此修煉今為仙林觀云

十里幽尋到洞門藤蘿竹樹費攀援長雲杳靄鸞驂

遠瘦石嶙峋虎跡存共愛文蕭成妙合誰從尹喜問  
真源高人又見希夷子一笑無言道更尊

遊始豐山道士陳此元出示往昔於閣阜山所  
得元德真人妙墨珍藏二十有三年矣自謂傳  
家之寶賦五十六字以歸之

當年仙馭下凌雲落紙雲烟妙入神弟子尚留真蹟  
在山靈長護墨光新淵珠借媚榮丹室石玉含輝照  
翠筠早晚六丁還取去赤書元自屬天人

奉和留題閣阜山詩韻寄呈太宗師元德真人

憶昔從師似夢中，明禋盛典已無同。  
棲遲霧豹真吾事，上下雲龍賴此翁。  
金薤琳琅清曉露，玉階環珮紫宸風。  
留侯早棄人間事，回首神山是故宮。

遊沖元觀道士孫元元出示吾友薛元卿所賦  
絕句清麗可愛，依韻輒賦三章，時璽書比衛元  
教蠲徭徭役故首章及之。

零露瀼瀼被蓼蕭，山林無復苦風飄。  
道人細讀黃庭罷，擊壤長歌答聖朝。

飛空何處覓文蕭，嶺上松花只自飄。  
風靜月明笙鶴

過恍疑仙子夜歸朝

溪女簪花只艾蕭  
山翁吹帽雪飄飄  
分明自得漁樵樂  
不識人間有市朝

贈墨客孫心淵

子荆有雲孫  
隱處異流俗  
山連始豐青  
池分劔江綠  
雲來幽興長  
水漲春意足  
元元守家學  
不受塵事感  
遠致徂徠松  
霏烟翳清旭  
元霜出杵臼  
翠餅照華屋  
揭侯吾畏友  
稱賞惟爾獨  
韋李雖擅場  
於今定臣僕  
奎章啓文運  
一藝必甄錄  
萬里行奮飛  
無爲守空谷

寄黃中菴

寶豐山下黃君則句曲峯頭許遠遊  
一種仙風兩夫子更於何處覓瀛洲

太一雷師許共叅別來長憶劍江南  
如何一片雲邊路不見黃公不壞菴

聞說巾車向撫州官情何事苦綢繆  
懸知後日相尋處擬峴臺高月正秋

富州行

富州城中雨翻盆富州江水侵城門  
三冬常苦風雨

惡兩月不解雲雷屯驚蟄已過平聲春未半白波浩  
漾無諸村寒氣憑陵失暘谷殺聲排蕩摧崑崙蟲蛇  
滿地憂凍死草木已茁何由蕃田家舉趾迷畎畝飲  
食顛倒傷精魂紆金太守在華屋一念忽復憂黎元  
酌水熏香走祠宇從官雜沓咸駿奔黃冠釋子出經  
像苟欲以此排天閣氛祲從來自乖戾回天有道須  
討論似是天公憐赤子詰朝已見扶桑暎五風十雨  
願終惠稽首再拜天何言

湖田

湖田春水漲遠近富魚蝦浪接雲邊樹風回海上查  
翁云深吠畝浩蕩失津涯農事嗟何及豐年望更賒  
元同文室六詠

瑞香

密葉舒青蓋繁花點絳唇幽香滿庭院桃杏敢爭春  
綠萼梅

野興青邱鳥豐安萼綠華瑤池別王母來傍列仙家  
紅梅

丹霞蒙素質絳袂掩清芬一與佳人別窗前忽見君

幽蘭

劍光千萬葉玉色兩三花  
珍重幽人操同心越歲華

黃木香

枯株便愛日嫩葉怯清霜  
風雨三春莫奈縻不敢香

百結

百結逢春日數花迎曉風  
道人無个事笑爾獨忡忡

黃堂隆道宮次韻陳秋巖所題

家住道遙擬鄭鄉尋真聊復過  
山陽千章古木連雲  
濕一種靈茅沁露香  
仙道猶推師道重歌聲還共水

聲長颯連歲歲瑤池會流俗何知有底忙

寧州太清觀厄于火且三年高士黃自牧焦心  
瘁躬走謁檀施期底于成訪予玉隆賦詩二十  
八韻見遺即韻答之

瓊旌堂上森圖書十年燕居已忘吾坐見朱顏生白  
鬚逢人自笑山澤臞外視不足中有餘顧影窈窕憐  
羈孤道人閱世周五湖滿襟風月真吾徒彈鋏歸來  
食無魚過我非爲利名趨背負錦囊從奚奴自云力  
耕闢荒蕪道喪交情誰笠車邇來奔走無安居翕赫

炎火中焚如耿耿樓觀成邱墟赤水居然索元珠突  
兀何時見其廬幾向秦庭哭包胥歲月擲人催柳蒲  
世事擾擾更榮枯勿念昔有傷今無時來不煩折簡  
呼瑤臺玉宇須凌虛翠炎穹龜照山隅黃房自足寧  
君軀豐功盛事端可模丹成千歲還清都

次韻答劉存菴

玉樹淮王後如君有幾人隱居便地勝樂道見天真  
雨霽千山曉風和萬象春求賢當盛世早晚覲楓宸  
隱者陳元亮故宋太守杉溪之子也有令名予

未之識一日賦詩一章寄玉隆道士陳雲隱高  
古可愛次韻以奉雲隱併寄元亮

有客何人斯揮毫落珠玉文章事經濟胡乃在巖谷  
知人視其友風月富隣屋陳子夙相親抱被或同宿  
朝來誦佳句溽暑快新浴山中十年事歷歷如轉燭  
獨餘詩酒興清絕映林麓彼美那可期君應往來熟  
義勝中無營環堵恒自足我欲往從之峴嶽畏山曲  
馮高挹西爽秀色窗戶綠五綬佳山水是處可游目  
達士輕去留反招有遺躅何事盍吾簪莫作龜藏六

歐陽南還陽得官廬陵郡幕歸自都中有作見  
寄次韻奉酬併寓相規之意云

憶昔燕山看飛雪貂裘駿馬長爲客君時獻書光範  
門十日八九見顏色奉祠一去十年強君映青衫五  
峯碧考書上上賦歸來雙石巖頭有新宅我北君南  
巧相辟東西望望長相憶好風吹墮雲錦章玉宇無  
塵得佳月天邊雨露定偏私不爾何由展奇翼廬陵  
劇郡繁簡書獄訟徵呼久殷積大才小試須重慎勿  
謂直尋斯枉尺仕止隨時合經訓言行悔尤疑殆闕

文忠祖武未云遠儒術傳家必清白期公勲業滿中  
朝燄燄輝光照天北

新昌貢士姚濟川楫道出玉隆賦詩來見即韻  
答之

廣寒宮闕高無極老桂吹香自開闢世上空聞顧鬼  
靈翟公不作誰能識綠髮朱顏姚氏子高歌款逐風  
雲起仰天攀桂遇明時九萬扶搖斯至矣學優並仕  
豈徒然以道濟時心契天定見聲華滿南北班生步  
武榮登仙健翮圖南一吹息五鹽山水生顏色重來

訪我錦帷中撥棄塵緣參道一

安成貢士周敬修惠詩次韻

皇元啓休運文物粲金玉道統系春陵大賢匪私淑  
賓興下明詔多士紛場屋有客西南來渥丹映宸旭  
雖逾知命年未改雙鬢綠長才浩河漢筆陣輕尺牘  
自云全相國禮下肯推轂君須慎儀矩未敢脫邊幅  
粹然廊廟姿豈復在空谷旦夕金榜縣彈冠喜新沐  
今辰感良會共此泛萸菊射策期春風承恩炫朝服  
燕雀徒紛紛焉能識鴻鳩吾方守舊邱放鶴自騎鹿

既醉欣太平非關飲醅醖期君恢遠業德澤均草木  
定交勿予忘高歌對銀燭

敬修再賦長句見贈次韻

晉柏千年聳奇恠遠並甘棠應勿拜旌陽神劍橫秋  
空六合蒼茫九州隘昨夜鸞駮還故里雷師頌洞風  
雨快朝光入戶寂無聞收拾神功歸上界憶昔朝天  
出清瀨珊珊環珮勝銀艾類看萬象雄森羅動地鈞  
天等秋噫奉祠南下得逍遙索居朝莫聆虛籟尚友  
如君同臭味便應崔沆知崔溼高秋戰藝淬文鋒意

氣雄豪輕勝敗大器輪困異瑚連既種亦須謀既戒  
中州文獻羅星鳳子亦矍然起江介青紫定知成俯  
拾巧官誰云俱狡獪飛黃騰達際明時記取任棠陳  
水薤道傳太極有家聲木鐸泐泐振聾聵我住雲林  
君勿羨晦明晝夜舒圖畫杏壇柏殿摠清安君系儒  
宗吾道派送君無物止新詩嶺上白雲非可賣

敬修集天下同文以壽諸梓用前韻賦詩一章  
求賢於子次韻

英雄昔未遇爨桂炊白玉終然位鄉相德望豈不淑

抱道復何求，公寧厭茅屋。寒驢與破帽，步月待朝旭。  
知音苟無人，燕石迷結綠。傾蓋方論交，新涼累篇牘。  
嗟予守祠官，短褐異華轂。愧非原結施，安得孟宗幅。  
大哉同文集，搜括遍山谷。訓誥雜風雅，窺覲必熏沐。  
藻麗敷春雲，幽芳散秋菊。銅鑊事銖積，異好匪奇服。  
象罔求元珠，桓榮致翔鵠。幽尋到真館，已候夜鳴鹿。  
勿言天外事，且飲盃中醪。富貴非公誰，榮遷定喬木。  
他年玉堂仙，烜赫金蓮燭。

題宜春山水圖贈謝景初

昔年仕昭萍地入吳楚交扁舟熟來往山水多巖壑  
上有宜春臺雲烟俯江郊輕別忽三紀光陰如石鼓  
謝生持卷來訪我松雲巢云有羅稚川筆力驅騰蛟  
生綃半幅間曲折藏泓坳摩挲識曾遊峻路平林梢  
五臺互鞦韆三峽爭叅窠秀氣何所鍾英姿匪管茅  
進德須及時青春無自拋歸哉有餘師世俗徒嗷嗷

送楊廷鎮摠管歸全州

江西省按考試竣事歸治所

全州太守楊夫子經術傳家世共稱化並文翁臨蜀  
郡仁推元結在春陵清湘浩浩恩波濶喬嶽巖巖夙

德升聖治維新求舊日佇看威鳳早鶩騰

送董文壽還山

文壽嘗師金野菴學道

我家龍虎山秀發山之南聖井羅諸峯群仙列雲菴  
龍泉啓華構樓觀何耿耿種杏聞董仙綠毛已氈氈  
邇來有雲孫勝處多窮探訪我騰勝天元微志同叅  
道超太極先一理中函三夜氣方鴻朦蟾光映秋潭  
可受不可傳吾言非高淡持歸問金子自言吾無慙

贈道人周無情

周生學老氏而以無情字為人苟無情木石復何異

猶龍五千言亦曰絕仁義三寶先慈儉慈愛情所寄  
聖人憂道喪矯激有深意學徒得其偏直以情我累  
性情自天稟應物無險詖於焉致中和化育贊天地  
斯今胡不然無乃果自棄爲作無情詩勗我爾賢知  
無情得詩謂予正之以中庸之道未盡無情之  
義復作八句偈以贈之

道人本無情悲喜了不系飛鴻雪泥跡去去那復計  
一月涵萬川何曾與俱逝吾知無情真爲說無情偈  
天寶洞天贈支鍊師

南紀多名勝西山得具瞻千峯迷遠近百里見洪纖  
突兀仙家出巉巖洞府兼瑤池青鳥去碧海紫鱗潛  
神物儲金盜騷人詫玉簾龍光騰瑞靄鶴影轉晴檐  
吳許高風在曹盧宿衛嚴播幢彌棟宇蕭鼓走閭閻  
祀典邦家重祈年水旱占蕭壇通絕頂罕廟類孤尖  
丹竈風煙合芝田雨露霑修篁吟鳳味蒼檜亂蚪髯  
藥島松脂滑泉斲石髓甜野花搖白氎山果落紅鹽  
興遠詩頻詠歌長酒屢添幽棲羨支伯文藻愧江淹  
訪古情何極尋真樂未厭他年續仙傳着我定無嫌

吳仙觀贈祖鍊師

在昔吳仙宅于今老氏祠萬山環翠阜一水匯丹池  
惟石金莖出修藤鐵鏢垂重門森羽衛秘殿靚檐帷  
御史三天秩真人百世師清時消瘴癘萬古息蛟螭  
紫誥旌神烈元功著鼎彝銖衣分縹緲瑤草競葳蕤  
鶴嶺雲千疊蛟湖月半規山靈驅象罔方士學安期  
鄭谷鸞鳳嘯嵩高熊豹姿秋空騰劔氣曉露沁詩脾  
上下多騎鹿逍遙獨采芝不關輕紱冕曾是畏羈羈  
好客門無鍵論心酒滿卮塵緣俱擺落清事摠相宜

古字唐人韻雄文宋代碑室虛光耿耿丹熟樂熙熙  
蓬閣知何異松喬定可追興來吟不盡醉筆寫榴皮

元都道士出示吾師月池翁三十四年前所賦

詩次韻以贈

上界元都觀雲關列萬松遠山晴見畫高閣坐聞鐘  
未問還丹訣聊舒辟世蹤懷哉老仙伯歸去主芙蓉  
道士祖竹溪見和再賦

萬古神仙宅層頭頰澗松廣寒通月戶虛白應霜鍾  
化鶴寧無術飛鳥豈有蹤霓裳謫世俗却擬壘芙蓉

送蔡九思如京師

蔡子事遠遊，彈冠向燕山。  
燕山帝王宅，虎豹嚴九關。  
經緯深軌轍，飛甍結雲端。  
珪組羅俊賢，輝光照人闕。  
男兒負經濟，白日生羽翰。  
金臺轟千仞，中道多險艱。  
八月寒風至，客衣常苦單。  
田園有真樂，去去何當還。

次韻劉明叟推官

萬古西林太史家，樓臺長是護烟霞。  
紅爐偃月留丹訣，翠柏凝霜拂劍花。  
龍臥有泉寒不竭，客來無酒夜能賒。  
高談一昔添詩興，清絕無煩雪水茶。

楚些二章爲丁石澗作

東風解凍兮草木華滋朝躋南山兮思遲遲憑高兮  
騁望媿人去兮何之石磊磊兮愁予澗冷冷兮聲悲  
聆雞犬兮雲中忽有無兮愈微心飛揚兮浩無極耿  
思君兮淚橫臆命巫陽兮下招窮八荒兮求索神山  
巍巍兮海上風波洶洶兮難即盍歸乎來兮舊鄉企  
予望之兮庭柏

若有人兮鸞岡紫霞衣兮白霓裳乘瑤光兮北極拜  
金色兮扶桑歲既晏兮寂寥炯神丹兮內明音芒厭

塵世兮溷濁，駕飛龍兮周章。周章兮何許，箭高明兮九阮。音罔思夫君兮耿耿，佇環珮兮鏘鏘。

丹陵觀道士胡天牖約余同遊古龍宮至丹陵胡留西山別墅宿留三日胡竟不歸賦五言二章以寄之

一與胡公別經冬春又殘，來遊鍾玉府為問紫金丹。采藥歸何晚，尋芳興未闌。長吟倚杉樹，日暮碧雲寒。古龍曾有約，春莫擬同遊。風駕成孤往，聯鑣竟莫酬。山空雲冉冉，風靜水悠悠。尚想髯公子，芳醪正獨篋。

題象牙潭古龍宮

錦江東流過西原江邊老木雲水昏祠宇沈沈著靈  
異龍宮設像古所尊珠宮貝闕浩無底世有漁者知  
其門歲旱為人作霖雨神功烜赫難具論紫髯道士  
好事者一一演說非虛言昔有張侯作太守夏秋水  
黍傷載燔封香遣使走祠下頃刻雷電咸崩奔萬丈  
橫江見髻鬣四郊甘雨如翻盆坐見焦枯變豐稔邦  
家藉爾蘇黎元古今施報昭祀典誕錫壽命當殊恩  
胡為膏澤久未下胥蠻空爾流諸村廟前行客笑且

語有功不賞何其繁况復龍居異人世服食不在壁  
與飧旱乾水溢靡終極蕩蕩神化天長存

題玉臺觀

冉冉春光取次歸玉臺高處閱清暉湖田水漲耕夫  
息野渡舟橫過客稀篁竹籠烟饒綠暗櫻桃帶雨長  
紅肥心清隨地皆仙境何用尋真入翠微

玉臺觀贈謔鍊師

平湖古觀勝山棲蕩漾波光綠打圍清磬拂雲驚曉  
夢落花和露點春衣高人自得養生主俗客那知杜

德機試問謀公行道處中天積翠是耶非

贈龔鍊師師少壯偏遊江湖能役雷致晴雨其  
師夏公亦以道法著名

隱君聞說夏黃公弟子傳燈已姓龔月下吹簫曾引  
鳳池邊縮水試降龍壯遊自適江湖興老去人看水  
雪容他日重尋應更健元關莫遣白雲封

古心萬鍊師樂道好施玉隆殿閣摧圯師將以  
己財作新之奉贈四韻

唐人曾詫萬仙翁此日雲孫道益隆古貌彌明譏石

鼎野心宏景畫金籠神交蓬閣蒼茫外興入江湖杳  
靄中更借廣寒修月手錦帷宮殿看成功

翰林典籍劉恭觀留題玉臺觀用工部閬州玉  
臺詩韻邀予同賦

玉臺何代築尚想少陵遊勝境西南異高名今古留  
山蟠龍虎勢水繞鳳麟洲髣髴紅雲近通明在上頭  
恭觀別去二十年邂逅玉臺話舊信宿而去用  
前韻贈之

憐君不得意又作五湖遊仕路何時達詩名到處留

濕雲迷古道春草遍芳洲去去須奇遇侯封在虎頭

題棠湖冲真觀

汝水沄沄去棠湖湛湛開苔侵碑碣古雲壓棟梁摧  
有客求丹訣無人問梓材松風更蕭瑟空有鶴歸來

題招仙觀

觀乃許太史鑄劍處近年主觀章高士重新  
之

唐朝古觀喜幽尋寂歷松篁護晝陰山閣雲深仙犬  
吠劍湖風起老龍吟章公盛業光前後太史神功邁

古今試問道人何所學傳燈無事只傳心

南昌道中

楊花飛盡楝花新芳草連天水欲薰賣笋野人形似  
鵲插稜紅音工女髻如雲煙光嫩澗陂塘滿曙色淒  
迷攏畝分見說田家更憔悴催科隨處吏成群

洞陽觀

江上神仙宅幽尋挂席來回風知島嶼映水得樓臺  
劍為降龍出門因放鶴開滄溟空浩蕩那更有蓬萊  
洞陽道士朱大中往歲識面於古洪獨見標致

秀美初不知其才能也余既題前詩大中屬和  
且叙宗盟句法清新意度高古與之語好學多  
藝年雖少奇才也復用前韻贈之

之子吾宗彥相思望汝來出塵者玉樹通籍在瑤臺  
文史三冬足詞章萬象開求賢當盛世喜見北山萊  
遊洞陽既留題五言詩宿留三日境與神會吟  
興不窮再賦七言律一章

彭蠡西來汝水東層臺突兀水雲中晴天蕩蕩黃金  
榜夜月沈沈碧玉宮河伯效靈熬北穩神仙朝帝鶴

巢空洪濤不隔尋真路我欲馮虛試御風

妙有堂

南湖有孤島流水通岷江蕩蕩來天風波濤日舂撞  
道人王遠徒既見心則降樓居扁妙有萬象羅紛龙  
道人學虛無妙有豈能吮常無與常有體用非珉珏  
一笑悟元理紅日生東牕

如清江訪舊出山遇雨

忡忡事行役暫喜午陰涼冒雨千山暗號風萬竅長  
前溪新漲綠早稻半傳黃處處歡聲起秋成定可望

瑞州道中連日喜雨

柳岸溪橋又一程  
疾風吹樹攪溪聲  
蛟龍半入雲頭黑  
蟬蛩斜分兩脚明  
客路敢辭泥滑滑  
田家賸喜水盈盈  
西林回首蒼煙外  
共樂年豐頌太平

重遊閣阜山三十韻

縮地求蓬島  
尋源訪羽人  
閣形千古異  
阜色四時春  
殿閣縣金榜  
巖廊擁玉宸  
雲霞光絢爛  
嶺岫勢嶙峋  
寶錄三天授  
鴻猷四海遵  
清朝崇大教  
重使展明禋  
憶昔陪師馭  
維時忝國賓  
皇華輝曉日  
紫氣靄秋旻

撒走風雷動恩沾雨露頻婁豐昭肝靈景福叙彝倫  
一別歲月久重來物象新山靈如喜客方士轉情親  
楊蔡松喬侶陳徐巢許隣丰姿出塵俗德望靡緇磷  
笑整謝公屐還醜陶令巾追隨忘遠近登頓覺逡巡  
絕頂壇雖險磨崖篆更神除妖歸正道濟世賴深仁  
赫赫仙翁秩班班上帝臣高奔凌日月飛步爾星辰  
故宅何年改元風浩劫振妙傳應有待良遇邈無因  
綠野招猿鶴滄洲想鳳麟石存雙鯉化潭卧九龍馴  
馬跡紛瑤草蒸枰護翠筠林深丹竈在霧暗墨池漣

琴筑涓涓響旌幢樹樹陳空塔環薜荔精舍莽荆榛  
勝事難窮盡幽棲豈隱淪何當分半畝共作葛天民  
時宗師楊京山提點蔡楚山提舉陳觀心宮倅  
徐心一故云

泊玉澗口

維舟玉澗口訪舊意如何地僻人煙少江空月露多  
踈鐘來野寺小艇亂滄波更喜仙家近臨風想玉珂  
明日入山奉宮主何叢月

釋舟行草路十里聽松風疊嶂開青瑣一溪流玉虹

神仙遺世遠，祀典至今崇。  
樓殿凌雲起，重興第一功。  
叢月見和再用韻答之。山乃梅子真得道之所。

東閣餘詩興，高人又姓何。  
論交金石重，閱世海田多。  
德潤山藏玉，心間井不波。  
神丹應已熟，玉陛看鳴珂。  
秀氣鍾群玉，如君有古風。  
丹心明皎日，文彩映長虹。  
吏隱今誰並，仙才世所崇。  
何當伐山石，椽筆紀成功。

題仁智山水圖

子昂內翰至元間為夏官郎中時作仁智山水圖以畀真人劉君玉筭道士羅環中從劉

學道乃得之距作圖之歲殆及二紀仁智乃  
羅故隱堂名珍藏又二十年矣余遊玉笥主  
羅君出以示余徵詩賦十韻以歸之

人心每好靜靜久動亦隨動靜有常道道合仁智基  
宣尼喻仁智謂與山水宜趙公遊聖門仁智固自知  
居官繪為圖寫此胸中奇羅仙家玉梁清輝肆娛嬉  
高堂扁仁智動靜人所思此圖一入手把玩頗恨遲  
願子勗貞操勿為聲利移達德先智仁宣尼不吾欺

叢月

石洞仙人舊姓何  
月明何事更披蓑  
知君玩世甘樵  
牧慙愧人間尚綺羅

明月壇

明月壇前露滿衣  
鳳簫聲斷彩雲飛  
梅仙一去無消息  
立盡殘更望鶴歸

三台松

落落長松百尺身  
碧霄常與泰階隣  
仙官閱世輕人爵  
肯並三槐詫重臣

澗泉

羣玉峯前水一灣  
濺濺流出白雲間  
神仙宴罷歸來晚  
卧聽空堦響珮環

遊玉笥山別叢月

合沓清江曲  
差莪三會峯  
濕雲青羽葆  
曉日碧芙蓉  
祝嘏鳴千澗  
屏幃列萬重  
玉梁蜿蜒化  
鐵柱妙形容  
突兀飛樓觀  
鏗鐃振鼓鐘  
恩榮丹詔下  
珍重白雲封  
鴻寶應難秘  
刀圭儻可逢  
高人曾狎鹿  
中使昔投龍  
金錄何寥闊  
瑤壇尚肅雍  
穹碑傳禹迹  
巨石紀仙蹤  
入谷東南奧  
懸厓子午衝  
野花明側塞  
幽草細蒙茸

曲折逾青嶂攀緣訪赤松蒼茫風景顛厭浥露華濃  
永嘯和天籟旁窺俯壑淙彤霞九真署司命百神宗  
祀典推嚴潔黎民盡敬共炳靈稱赫赫求福見憧憧  
郁木霏香遠華芝秀氣鐘嵐光騰瑞靄磴道峙崇墉  
梅尉誰能並何公世莫從祠官今水部俗客匪周客  
去去尋輕舸行行伴瘦筇題詩無好語一笑賴彌縫

周大江遊仙詩

四海大江翁時清道更窮還將醫國手轉作活人功  
粟里今陶令東山昔謝公九京如可起端有萬夫雄

廬陵周處士束髮幕前修靜得琴中趣聞從方外遊  
瀛洲餘歲月宰樹幾春秋喜有承家託諸郎更炳彪  
送郭志尹秀才趨上京

之子儒林彥汾陽幾世孫沈深窺學海浩蕩見詞源  
白日風雲會青春雨露恩遙歸拜家慶盛事說名門  
宗友大中惠詩歎此淹留次韻解之

晉柏凌空翠入樓祠官老我十年留世緣袞袞翻疑  
夢詩興寥寥冷欲秋天外錦帷瞻太史雲端仙袂挹  
浮邱師承正好親同姓莫作騎鯨汗漫遊

曲曲闌干百尺樓每於多景獨遲留紅霞出海千山  
曙白露涵空萬里秋人世忘機皆樂地仙家隨處是  
丹邱桃椎芳躅分明在何用求師賦遠遊

登華蓋山虞十一學士枉詩見寄次韻

朝元劔佩逼中台頗視巔崖念草萊萬象盡從天外  
見三峯疑自海中來丹池月冷龍應蟄琪樹風高鶴  
未迴此景若無虞學士野情詩興亦寥哉

魏魏華蓋像天台石有龍湫山有萊黃獨苗栢仙子  
去青冥路穩世人來軍山南望雲千疊贛水東流勢

九迴若向輿圖辨方域分明指掌信奇哉

雍國當年位鼎台清朝又見北山萊挂冠莫向南州  
去賜酒朝從上國來蓋世文章多忌嫉致君事業尚  
遲迴時人不識乘桴意却擬承貞更遠哉

丹霞道士黃知微見和再用韻答之

禮斗壇高籥上台丹霞長爲護蒿萊巖花委地知猿  
過庭竹搖風企鳳來問道有緣千里遇遊方無定幾  
時迴乾貞戶帖山中寶早賦歸歟信美哉

題白雲深處圖贈麻姑道士上官元元

亭亭麻姑山翠色出天半山中有佳勝原野平若案  
道人極幽討結構巖谷畔松風激飛泉彷彿絲竹亂  
白雲護蒼蘚蕪徑人迹斷人間那有此直恐縣圖貫  
道人上官生旭日示方旦居然絕華念甘與麋鹿伴  
學道期精堅毋為畫龍玩持歸語麻姑為我一笑粲  
蘇文忠公嘗謂人之為文須令氣象崢嶸精彩  
絢麗漸老漸熟方造平淡其實不是平淡乃絢  
麗之極若徒見其平淡而便學此樣則失之矣  
貞一尊師見教所作有古體自成一家披卷吟

終偶憶蘇公之說敬歌二絕

烟霞黼黻爛長虹盡斂光芒入太空  
存得本初根抵在自然機軸妙天工

其一

學詩真與學仙同換骨元非一日功  
見繞九秋風露足纖埃磨盡見真空

其二

貞一齋詩稿終